

## Per trutgs e pitgognas dals 29-04-2011

**Proposta da Joachim Wasescha**

### ***Excursiun primavauna en Sotgôt***

Sotgôt è la part sut da la val Surses. L'excursiun cumenza ins tar la posta Savognin, alura passa ins la via Segantini che maina tras la part nova da la vischnanca si encunter il guaud. Il grond pictur da las alps Giovanni Segantini ha vivì a Savognin ils onns 1886 - 1894 ed ha stgaffi durant quel temp ina gronda part dals ses pli impurtants maletgs. Tar la punt sin punct 1285 chat'ins il mussavia cun l'indicaziun da la senda Segantini, ina senda panoramica in toc sur la val cun bellas vistas. Ins passa Tinizong sur vischnanca ed arriva tar la via che maina en val Err. Quella traversa ins e prenda il trutg che va encunter Proschen. Sur Proschen banduna ins la via d'Err e prenda la via da guaud che dirigia vers las aclas da Plaz Beischen cun ina vista extendida sin Sotgôt. Curt suenter las aclas chatta ins in trutg marcà, che passa tras in territori da bovas cun crappa plain mistgel e suenter ina mes'ura arriva ins a Rona. Suenter l'emprima chasa va ins da maun dretg sin la uschenumnada via dals Romans. Armon Planta ha chattà e documentà ils onns 1980 diversas restanzas da la via dals Romans en il guaud tranter Rona e Tinizong. A Vardaval traversa ins la via chantunala, e la senda da viandar maina giu tar il Ragn d'Err e bain spert er tar la riva da la Gelgia. Ins passa la resgia da Tinizong, tar la centrala da l'EWZ traversa ins il flum e sin la riva sanestra arriva ins puspè a Savognin.

Igl è er pussaivel da turnar cun la posta davent da Rona u da Vardaval.

|            |            |
|------------|------------|
| lunghezza  | 13 km      |
| ascensiun  | 500 m      |
| descensiun | 600 m      |
| durada     | 4 - 5 uras |